



17

Niining Leksyona Matun-an Mo Kini

Nagaampo si Jesus alang sa Iyang mga
Tinun-an

Ang mga katawhan nga Gipiyal Mo sa
akong mga kamot

Ilikay Sila Gikan sa mga Kadautan

Mahiusa Unta Sila

Aron Magauban Sila Kanako.

NAGAAMPO SI JESUS ALANG SA IYANG MGA TINUN-AN

(Basaha ang Juan 17)

(Ang mga katawhan ng Gipiyal mo sa akong mga kamot)

(Basaha pag-usab ang Juan 17:1-8)

Ang Juan kapitulo 17 mao ang pag-ampo nga giampo ni Jesus alang sa Iyang mga tinun-an sa wala pa Siya dakpa. Natapus na ang Iyang buluhaton sa pagpanudlo ug pagsulti. Pinaagi Kaniya ang Iyang mga tinun-an nakaila sa Dios. Gihatagan Niya sila ug kinabuhing dayon.

Juan 17:3. Ug ang kinabuhing dayon mao kini, ang ilang pagpakaila kanimo nga mao ang bugtong tinuod nga Dios, ug kang Jesu-Cristo nga imong pinadala.

Ang takna miabot na nga si Jesus mamatay alang sa mga sala sa kalibutan. Iyang gidala ngadto sa Iyang Amahan ang mga katawhan nga gipiyal sa Iyang mga kamot sa dinhi pa Siya sa kalibutan. Sila nagapuyo pa sa kalibutan apan dili na sila kabahin sa kahugaw, ug dili diosnong mga paagi. Nagkinabuhi sila alang sa Dios inay sa pagkinabuhi sa kalibutang kalipay, gahum ug kadunganan.

Buhata Kini

1. Sag-uloha ang Juan 17:3.

ILIKAY SILA GIKAN SA MGA KADAUTAN (Basaha ang Juan 17:9-20 pag-usab)

Nagsulti si Jesus mahitungod sa mga katawhan nga gihatag Kaniya sa Dios dinhi sa kalibutan. Ang mga tinun-an ni Jesus wala matawo ingon nga mga balaan o putli. Sila makasasala usab sama sa ubang mga tawo. Apan sila mibiya gikan sa ilang mga sala ug mitoo kang Jesu-Cristo ug misunod Kaniya. Ug busa nangaluwas sila.

Nasayud si Jesus nga Siya mobiya na sa Iyang mga tinun-an niadtong gabhiona. Nag-ampo Siya sa Dios sa pagtipig kanila gikan sa mga kadautan. Usa sa mga tinun-an nga si Judas nawala bisan ug diha pa si Jesus. uban kanila. Nasayud si Jesus nga human Niya biyaan ang Iyang mga tinun-an, silang tanan pagatintalon aron sa pagbiya gikan sa mga gikatudlo ni Jesus kanila ug magkinabuhi sa daan nilang kinabuhi.

Si Satanas dili makakuha kanato gikan sa Dios, apan naningkamot Siya nga kita mismo ang mutalikod gikan sa Dios ug mobalik ngadto sa sala. Tapus ka mohunat sa pagkinabuhi alang kang Cristo, si Satanas, magatintal kanimo pag-balik ngadto sa kasal-anan. Hinumdomi nga si Jesus naga-ampo alang kanimo ug nagapadayon sa pag-ampo alang kanimo karon.

Hebreohanon 7:25. Busa, sa tanang panahon siya arang makaluwas sa mga moduol sa Dios pinaagi Kaniya, sanglit buhi man siya sa kanunay aron sa pagpangamuyo alang kanimo.

Wala pangayoa ni Jesus sa Amahan nga kuhaon kita gawas sa kalibutan aron dili kita magaantos. Aduna pa kitay mga buluhaton. Gipadala Niya kita sa kalibutan uban sa mensahi sa kaluwasan.

Sa makadaghan niining kapituloha, gitudlo ni Jesus ngadto sa Iyang mga tinun-an nga Siya naghatag kanila sa matuod nga pulong sa Dios: Makita sa bersikulo 8, 14, 17. Sa bersikulo 17 gisultihan kita nga mga iya na kita sa Dios pinaagi sa Iyang Pulong.



Miingon usab si Jesus nga gipadala Niya ang Iyang mga tinun-an nganhi sa kalibutan maingon nga gipadala Siya sa Dios. Mianhi si Jesus aron sa pagpangita ug pagluwas sa mga nangawala. Busa kitang mga Cristohanon kinahanglan nga kanunay ta silang hatagan sa Pulong sa Dios diha sa mga simbahan, mga eskwelahan, mga basahon, sa radyo ug pinaagi sa pagsaksi ngadto kanila. Ug kinahanglang magkinabuhi kita ingon nga matuod gayud nga mga Cristohanon sa atubangan sa mga katawhan aron sa pagpakita kanila sa dalan sa kinabuhi.

Buhata Kini

2. Giunsa man pagtagad ni Satanas ang mga Cristohanon?

- . . . a) Gipasagdan Niya sila.
- . . . b) Nagatinguha siya sa pagpabiya kanila gikan sa Dios ug pagpabalik kanila ngadto sa sala.
- . . . c) Gipahilayo Niya sila gikan sa Dios

3. Unsa may atong buhaton dinhi sa kalibutan.?

- . . . a) Magaampo kita nga mobiya na kita dinhi.
- . . . b) Magkinabuhi kita dinhi ug magpahimulos sa mga kalingawan.
- . . . c) Ihatag nato ang Pulong sa Dios ngadto sa mga katawhan.

4. Giunsa man ni Jesus pagpadala ang Iyang mga tinun-an nganhi sa kalibutan?

- . . . a) Ingon nga karnero nga walay magbalantay tungod kay mibiya man si Jesus.
- . . . b) Ingon nga gipadala sa Dios si Jesus; aron pagluwas sa mga makasala ug pagdala kanila ngadto sa kaluwasan alang sa Dios.
- . . . c) Ingon nga miembro sa simbahan aron pagdasig sa katawhan sa pagpasakop ug simbahan.

MAHIUSA UNTA SILA**(Basaha ang Juan 17:20-23 pag-usab)**

Nagaampo si Jesus dili lamang alang sa Iyang mga tinun-an nga nagpuyo sa unang panahon kondili sa tanan nga magatoo Kaniya. Kini nagaapil kanimo. Nag-ampo si Jesus nga ang tanan Niyang mga tinun-an magakahiusa. Kini nagapasabot nga buot Niyang magkinabuhi ug magabuhat sila diha sa panaghi-usa. Dili maayo sa usa ka Cristohanon nga magbahin-bahin ug magabuhat batok sa usa ug usa.

Adunay daghang simbahan, apan ang matag sakop sa maong simbahan mahimong magkinabuhi nga malinawon kon ilang ibutang si Cristo nga labing una sa ilang mga kinabuhi. Adunay mga katawhan karon nga moingon nga gikinahanglan nga ang tanang simbahan managhi-usa. Apan dili kini mahimo hangtud nga ang matag simbahan nagatoo pa sa nagkalainlaing mga butang.

Dili kita makahiusa sa usa ka simbahan nga wala magatoo sa gitudlo ni Jesus. Nagatoo kita nga si Jesus mao ang Anak sa Dios. Nagpakatawo pinaagi kang berhin Maria ug nga ang Iyang kamatayon ra ang usa ka paagi nga makaluwas kanato gikan sa sala. Kinahanglan magkauyon kita niining usa ka importanteng butang ko “magahiusa man kita!”

Amos 3:3. Magakakuyog ba ang duruha gawa kon sila magakauyon?

Nag-ampo si Jesus nga unta mahiusa kita diha Kaniya ug ngadto sa Amahan. Ang pagpa

sakop kang Cristo maoy labing unang butang sa Cristohanong panaghi-usa. Kon buot ka ug Cristohanong panagsandurotay, pagpasakop sa usa ka simbahan nga nagatoo, nagatudlo ug nagatuman sa Biblia, sa usa ka simbahan diin ang presencia sa Dios matuod.

Buhata Kini

5. Alang kang kinsa man ang pag-ampo ni Jesus?
 - . . . a) Alang sa dose ka mga tinun-an lamang.
 - . . . b) Alang sa mga sakop sa simbahan, nga unta mag-usa na sila ug simbahan.
 - . . . c) Alang sa tanang nagatoo Kaniya, bisan kadtong mga nagatoo karon.
6. Gibati ba nimo ang kalipay sa imong kasayuran nga naga-ampo si Jesus alang kanimo
 . . . Pasalamat siya sa Iyang mga Pag-ampo.
7. Sa dihang nag-ampo si Jesus nga mahiusa ang iyang mga tinun-an, nagapasabot ba kini nga ang tanang mga Cristohanon karon kinahanglan nga magpasakop sa usa ra ka simbahan karon?
 - . . . a) Oo, gikinahanglan nga usa ra ang simbahan.
 - . . . b) Dili, ang Kristohanon walay simbahan
 - . . . c) Dili, tungod kay ang ubang simbahan wala magatoo sa mga butang nga gitudlo ni Jesus.
8. Pag-ampo nga magaka-uyon ang mga Cristohanon.

Aron Maga – uban Sila Kanako
(Basaha ang Juan 17:24-26 pag-usab)

Gitapos ni Jesus ang Iyang pag-ampo pinaagi sa pag-ingon nga buot Niya nga ang Iyang mga tinun-an maga-uban bisan asa Siya. Usa ka adlaw nian sa umalabot mouban kita Kaniya. Ang basahon sa Pinadayag (ang kaulahiing basahon sa Biblia) nagasulti mahitungod sa mga linuwas nga nagatindog atubangan sa trono sa Dios ug nagaawit sa pagdayeg kang Jesus ang cordero nga giula.

Wala kita masayud kon anus-a kita tawgon sa pagpakig-uban sa Ginoo. Ug hangtud dili pa kita moabut niini gikinahanglan nga magkinabuhi kita adlaw-adlaw sa pagpahimuot sa Dios. Ug dili kita mahadlok sa kamatayon tungod kay atong nahibaloan nga ang kamatayon mao lamang ang pultahan diin kita magasulod ngadto sa presencia sa Dios.

Ang mga linuwas lamang mao ang pagakuhaon ni Jesus. Ang wala mangaluwas wala gayuy luna Kaniya. Buot ka bang makig-uban kang Jesus sa walay katapusan?

1 Tesalonica 4:16-18. Kay ang Ginoo gayud mao ang manaug unya gikan sa langit inubanan ug singgit sa pagsugo, ug sa tawag sa punoan sa mga manulonda, ug sa tingog sa trumpeta sa Dios. Ug unya ang mga nangatay diha kang Cristo mouna sa pagpamangon; ug kita nga mga buhi pa nga mahabilin, pagasakgawon ngadto sa mga panganud

uban kanila sa pagsugat sa Ginoo diha sa kahanginan; ug sa ingon niini kita magapakig-uban na sa Ginoo sa tanang panahon. Busa paglipayay kamo sa usa ug usa pinaagi niining mga pulonga.

Buhata Kini

9. Giunsa man pagtapus ni Jesus ang Iyang pag-ampo?
- . . . a) Pinaagi sa pag-ingon nga buot Niya nga ang iyang mga tinun-an maga-uban Kaniya bisan asa Siya.
 - . . . b) Pinaagi sa pag-ingon nga maghatag Siya ug laing kahigayonan nga maluwas human sa kamatayon.
 - . . . c) Pinaagi sa pag-ingon nga ang kalibutan nasayud sa Dios.
10. Kon mamatay ka karon makapaneguro ka ba nga makig-uban ka sa Ginoo?
- . . . a) Wala ako maseguro.
 - . . . b) Dili, tungod kay wala pa ako maluwas.
 - . . . c) Oo, tungod kay nagatoo ako kang Jesus ingon nga akong kaugalingong manluluwas.

Kon dili nimo masulatan ang blangko nga c), kinahanglang mohunong ka karon dayon ug mag-ampo kang Jesu-Cristo nga hinloan ka gikan sa imong mga sala ug luwason ikaw. Nan ikaw usab makaseguro nga makaguban sa Ginoo.

11. Itandi ang imong tubag sa hustong tubag nga anaa sa katapusan niining leksyona.
12. Sulati ang imong Rekord sa Estudyante alang sa ika-17 nga leksyon.

Mga Tubag sa Ika-17 nga Leksyon

Kon aduna kay 5 o 6 ka hustong tubag markahi ug labing maayo, kon 4 markahi ug maayo; kon 3, kasarangan. Kon kubos sa 3 ang imong hustong tubag basaha pag-usab kining leksyona.

2. b) Nagatinguha siya sa pagpabiya kanila gikan sa Dios ug pagpabalik kanila ngadto sa sala
3. c) Ihatag nato ang Pulong sa Dios ngadto sa kalibutan.
4. b) Ingon nga gipadala sa Dios si Jesus aron pagluwas sa mga makasasala ug pagdala kanila ngadto sa kaluwasan alang sa Dios.
5. c) Alang sa tanang nagatoo Kaniya, bisan kadtong mga nagatoo karon.
7. c) Dili, tungod kay ang ubang simbahan wala man magatoo sa mga butang nga gitudlo ni Jesus.
9. a) Pinaagi sa pag-ingon nga buot Niya nga ang Iyang mga tinun-an maga-uban Kaniya bisan asa Siya.

Gidaghanon sa hustong mga tubag _____

Grado _____